

lis Gnovis

■ **GURIZE.** La rivoluzion di Basaglia

Dal 1961 al 1969, Franco Basaglia al à inviât e sperimentât a Gurize, biel ch'al direzeve l'ospedâl psichiatric dal Friûl orientâl, chê rivoluzion te cure de malatie mentâl che dal 1978 e sarâ ricognossude uficialmentri mediant de leç statâl 180. Chê stagion e je presentade inte mostre digjital e interative «Diritti al Cubo D3. Gorizia epicentro di una rivoluzione. La fine del manicomio, la nascita dei diritti», curade de fie dal psichiatri venezian, Alberta, cun Roberta Demartin. L'esposizion e je imbastide li de Fondazione «Cassa di Risparmio» di Gurize, tai ambients di strade Carducci (prenotazion obligatorie al numar 334 1206960; oraris: lunis-sabide, 10-12 / 16-28; <https://dirittialcubo.it>).

■ **BIBION.** Un mâr inclusif

«Spiaggia per tutti, modello d'Europa»: chest al è il titul che il suplement setemanâl «BuoneNotizie» dal «Corriere della Sera» al à sielzût par pandi i merits e lis cualtâts di «Bibione inclusiva». Il scandai sul centri turistic dal Friûl concuardiês sot Vignesie, curât di Alessandro Cannavò, al proferis il grant impegn par vierzi lis puartis a ducj «gli invisibili», butant jù «le barriere», ch'a penalizin «disabili, dializzati, celici, vegani». Di chê strade, si presente ancje la guide eletroniche «Destinazione ospitalità accessibile» che si pues disjamâ sore nuie dal lûc internet www.villageforall.net/guide, cui speciâi su Bibion e ancje su Pordenon.

■ **PLODN/SAPADE.** 57 milions pal schi

La Zonte regionâl, prin di progjetâ il plan d'investiment ch'al rionç altris 36 milions di euros ai 21,5 za destinâts cul «Piano Montagna 365» par rinovâ i centris pal schi di Plodn/Sapade (15 milions), dal Tarvisian (15), dal Çoncolan (10), di For Disore (7,3), dal Plan dal Cjaval (5,5) e di Nevee (3,8), aie scoltâts i esperts di «Arpa-Osmer Fvg»? E je la cuistin che il grop dal «Patto per l'Autonomia» i à fat in Consei, rivocant i esits dal studi dal 2018 dai climatolocs e dai meteorolocs regionâi. In chê volte, a vevin pandût «dâts impressionants»: de riduzion des zornadis di nêf di 15-30 dis ad an a une cuote di nêf stabil parsore dai 1800 metris sul nivel dal mâr par colpe di un'incressite mezzane des temperaduris, vie pal Invier, sui 2 grâts.

■ **UDIN.** La Lavagne plurilengâl

La rêt pe educazion plurilengâl e pal «Clil» in lenghe furlane, «La Lavagne Plurilengâl» (www.lavplu.eu) e à publicât la risulde de «fotografie linguistiche» scatade vie pal an scolastic 2020/21. Il scandai su lis lenghis dopradis, in famee, cui amis e a scuele, dai arlêfs des classis primis di 7 scuclis superiôrs si po leilu a lis direzions: http://www.lavplu.eu/index.php?page=pluri/pluri_foto&lang=it e <https://app.box.com/s/75f41fjm8dpj434q214gaagjdijkoth4>. «La Lavagne Plurilengâl» e presente ancje il coment curât di Gabriele Zanello de Universitât furlane, intant de convigne «Plui lenghis, plui vite» (<https://youtu.be/U2MDN37o-bM>). Vie pal an, la rêt e à proponût tes scuclis associadis ancje un laboratori didatic su la Biblioteche Guarneriana, presentade par furlan a passe 170 students di Angelo Floramo (https://youtu.be/r2SV0u_VY7g).

Miercus 23	S. Bili vescul	Domenie 27	S. Cirili vescul
Joibe 24	Nativitât di S. Zuan Batiste	Lunis 28	S. Ireneu vescul
Vinars 25	S. Eurosie	Martars 29	Ss. Pieri e Pauli ap.
Sabide 26	S. Josemaria Escrivà	Il timp	Soreli plen e afe.



Il soreli
Ai 23 al iève aes 5.16 e al va a mont aes 21.02.



La lune
Ai 24 Lune plene.

Il proverbi
Se no si riscje no si rosee.

Lis voris dal mê
Cimait i fasui rampighins e lis favis cuant che a àn la rose. Rarî i ramaçs dai pomârs (miluçârs, pîruçârs, pierçolârs, armelinârs, cîspârs).

Rinovâ la muse de Tiere

Une letare pai trê
Vescui e pai Plevans
de Glesie furlane

«**T**i domandin di convidi daurman cheste letare cul to Plevan e cul to Vescul, in mût di garantî la partecipazion de tô

Parochie e de tô Glesie diocesane a chest moment speciâl dal an»: la letare che si çacare in chest apel, difondût za fa cualchi di dal Moviment catolic mondiâl pe clime («Gccm»), e je chê dal segretari dal Dicasteri vatican pal Svilup uman integrâl, monsignôr Bruno-Marie Duffé; il moment speciâl al è il «Timp dal Creât», ch'al torne a colâ dal 1 di di Setembar ai 4 di Otubar cu ven; e i destinatari a son ducj i miârs e miârs di components de rêt internazionâl dai Circui e dai Animadôrs «Laudato si», sparniçats di un ôr a chel altri dal Marimont. La celebrazion ecumeniche dal «Timp dal Creât» e je daûr a inlidrisâsi e a slargjâsi a pitinton, di man in man che lis Comunitâts cristianis a spalanchin lis sôs oreli par scoltâ «il berli dai puars e il berli de Tiere», ch'è je une virtût cristiane impretebil inte ete de crisi ambientâl, economiche, sanitarie e sociâl ch'è menace l'umanità interie. «La famee cristiane mondiâl, ispirade dal teme di chest an "Une cjase par ducj? Rinovâ l'oikos di Diu", e çaparâ part a iniziativis di preiere, di sostenibilitât e di mobilitazion par tignî cont de nestre cjase comugnâl – al scrîf monsignôr Bruno-Marie Duffé –. Il simbul di chest an, la Tende di Abram, al palese la nestre clamade ecumeniche al biel acet radicâl, ch'al sigure un puest te famee (l'oikos) di Diu par ogni creature, tant umane che no umane». In grazie dal «Timp dal Creât», i



Iniziative ecumeniche par denunziâ l'emergence climatiche

E je començade la preparazion pal «Timp dal Creât» dal 2021

cristians a «rinovin la sô fede intal Diu creatôr e si unissin in mût speciâl, te preiere e te azion pe curie de nestre cjase comugnâl», cemût ch'al à marcât ancje Pape Francesc, pe edizion di an passât. Tant il Dicasteri pal Svilup uman integrâl che il Moviment catolic mondiâl pe clime, tai siei lûcs internet, ur ufrissin za a Comunitâts e Clapis, a Glesiis e istituzions, imprescj di ogni fate par promovî e par organizâ il «Timp dal Creât». In specialitât, al è fresc di scree il sit «Piattaforma di Iniziative Laudato si», presentât di chê strade dal «An Laudato si», ch'al à memoreât l'inovâl de publicazion da la letare encidicla su la curie de cjase comugnâl dal 2015. Insom de sô letare il quartevôs dal Dicasteri vatican al scrîf ancje: «O incoragin i Vescui e lis istituzions glesieistiche a fâ des declarazions par popularizâ il Timp dal Creât, in

mût di judâ i cristians a çjapâ cussience dal fat che «vivi la vocazion di jessi vuardians de opare di Diu al è essenziâl par une vite di virtût, nol rapresente un fat opzionâl e nancje un aspjet secondari de esperience cristiane» (Laudato si' 217)». La mobilitazion di ogni cristian e di ogni Glesie diocesane e parochiâl a pro dai biâts dal mont, ch'a son lis vitimis plui tibiadis dai savoltaments climatics causonâts dal sisteme economic predatori, gjenocidiari e ecocidiari dal di di vuê, in chest an, e je tant plui necessarie, seont monsignôr Bruno-Marie Duffé, dal moment che i sorestants dal mont a son daûr a preparâsi pes convignis da lis Nazions unidis «Cop 15» su la Biodiversitât, ch'è colarâ vie pal mê di Otubar, e «Cop 26» su la clime, programade pal mê di Novembar cu ven.

Mario Zili

Peraulis in dismentie par cure di Mario Martinis

❖ **ROGANT**

s.m. = uragano
(da uracan)

Siere i scûrs des çamaris che al rive un brut rogant.
Chiudi le imposte delle camere che arriva un brutto uragano.

❖ **RÔL**

s.m. = quercia
(dal latino robus "rovere", il genere femminile è documentato nell'Italia settentrionale)

Dopo il bosc di rôl tu cjatis il cjasâl.
Dopo il bosco di querce trovi il casale.

❖ **RONC**

s.m. = terreno in pendio coltivato a vigna
(continua il latino runciolô, da runcare "arroncicare, dissodare, sarchiare", è da confrontare con runcarius "sterpeto")
Le ribuele e ven miôr in ronc che no in plan.
La ribolla viene meglio quando si trova in pendio anziché in piano.

❖ **RONFLEÂ**

v. = russare, ronfare (dal latino tardo rhonchare "russare", con interferenza del verbo sufflare "gonfiare, soffiare")

O ronflei dute la gnot e vie pal di mi sint un biel pôc strac.
Russo tutta la notte e durante il giorno mi sento molto stanco.
"I miei compains di viaz, cui ca, cui la, Indurmidiz, spessein a roncedâ" (Nardini 46)

❖ **RONTENÂ**

v. = piagnucolare con brontolio continuo, piangere rumorosamente (nel Cormonese); brontolare, rumoreggiare (del tuono); mangiare con rumore, masticare cose dure (da confrontare con il latino *ragitare "raggiare, raitare")
A son trê oris che al rontene ma no vûl di ce che al à.
Piagnucola da tre ore ma non vuole dire cos'è che ha.
Al rontene di vuê a buinore ma nol plûf.
Brontola da stamattina ma non piove.
Ma almancul ise buine la caramelle? Tu le às rontenade par dut il viaç.
Ma almeno è gustosa la caramella? L'hai masticata tutto il viaggio.